

М.ӘУЕЗОВ АТЫНДАҒЫ УНИВЕРСИТЕТ

Елбасы кітапханасындағы студенттер семинары



ҚР Тұңғыш Президенті – Елбасы кітапханасында «Болашаққа жол өзіннен басталады» атты республикалық жастардың семинар-тренингі ұйымдастырылды. Бұл басқосуға М.Әуезов атындағы Оңтүстік Қазақстан мемлекеттік университетінің ректоры, академик Дария Қожамжарова бастаған 25 студент қатысты.

Жоғары оқу орнынан барған делегаттарды ҚР Тұңғыш Президенті Елбасы кітапханасының директоры Әмірхан Мұратбекұлы Рахымжанов арнайы қабылдап, өз сөзінде Елбасы еңбегіне ерекше мән беріп, жастарға жан-жақты талдап, түсіндірді. Семинар-тренингке шым шаһардан жиналған жастар бұл жиыннан ерекше әсер алып, өзіндік танымын қалыптастырды. Елбасы еңбегінің ересен жемісін көріп, көрмеге қойылған кітаптармен танысты. Тәуелсіз мемлекетті отыз жылға жуық басқарған әлемге танымал тарихи тұлғаның ғибратты ғұмыры мен өнегелі өміріне қызыққан жаңа буын өкілінің баянды болашағымызға нық сенімі беки түсетіні анық.

Жиында сөз алғандар Елбасымыз Нұрсұлтан Назарбаев – ұлт тарихының ең бір күрделі кезеңінде ел басқарған ұлы тұлға екендігіне тоқталып, өткен ғасырдың тоқсаныншы жыл-

дары алып қызыл империя тарқаған уақытта ел тізгінін қолға алған көрегендігіне ерекше мән берді. Кеңестік саяси жүйенің бәрі құрдымға кетіп, экономика шатқаяқтап, ортақ ақшадан ажырап, идеология мен мәдениет, білім сияқты барлық сала атаулы ақсап, ел еңсесі түскен уақыт еді. Оның бәрі айтуға ғана оңай нәрселер. Осындай қиын-қыстау жағдайда ел ішін реттеп, оның болашағын болжап, алға сүйрейтін тұлға қажет еді. Осындай ауыр миссияны Тұңғыш Президент өз мойнына алып, абыроймен атқарғанын жан-жақты ашып көрсетті.

Ұлт көшбасшысының мемлекетіміз үшін жасаған ұлы еңбектері – жас ұрпақтың алдындағы жарқын бағдары. Оның жемісін көретін уақыт алда. Жастар семинар-тренингтің нәтижесінде Елбасы еңбектерінен өздеріне жасалып жатқан қамқорлық пен берік қолдауды анық сезініп, елімізді көркейтіп, абыройын асқақтатуда зор еңбек ету керектігін терең түсінді. Қазақстанның ғылым саласын дамытып, әлеуетін арттыру керектігін сезінді. Әр саладан жаңалық ашып, тарихымыздың зерттелмей жатқан беттерін, байтақ даланың сан қырын бүкіл әлемге терең танытатын кез жеткенін түсінді. Іс-шара соңында барлық қатысушы-делегаттарға арнайы сертификат пен Елбасы еңбектері табыс етілді.

М.Әуезов атындағы ОҚМУ-дың баспасөз қызметі